

तीमुथियुस कै नाम प्रेरित पौलुस की पटल्ली चिट्ठी

1 पौलुस की ओड़ तै, जो म्हारे उद्धार करण आळे पणमेसर अर म्हारी आस मसीह यीशु के आदेश तै मसीह यीशु का प्रेरित बणया सै,

2 तीमुथियुस तारीं जो बिश्वास म्ह मेरा साच्चा बेट्टा सै, परम पिता पणमेसर अर म्हारे प्रभु यीशु मसीह की ओड़ तै अनुग्रह, दया अर शान्ति मिलै।

झूठे उपदेशां के बिरोध म्ह चेतावनी

3 मकिदुनिया जान्दे बखत मन्ने थारे तै जो इफिसुस म्ह ठहरण तारीं कहा था, मैं इब भी उससे आग्रह तारीं दुहराण लागरया सू। ताके तू ओड़ै कुछ लोगां की झूठी शिक्षाएँ देन्दे रहने, **4** मनगढ़ण आळी कहानियां, अर अनन्त वंशावलियां पै जो लड़ाई-झगड़यां नै बढ़ावा देवै सैं अर पणमेसर के उस मकसद तारीं सिद्ध नीं होण देन्दी, जो बिश्वास पै टिकरया सै, ध्यान देण तै रोक सके। **5** इस आग्रह का मतलब सै ओ प्रेम जो पवित्र हृदय, सारया तै बढ़िया चेतना अर छळ रहित बिश्वास तै उत्पन्न होवै सै। **6** कीमे लोग तो इन बातों तै छिटक के भटक गे सैं अर बेकार बकवादां म्ह जा फँसे सैं। **7** वे व्यवस्था के विधान के उपदेशक तो बनणा चाहवै सैं, पर जो कीमे वे कहण लागरे सैं या जिन बातों पै वे भोत जोर देण लागरे सैं, उन लग तारीं वे नीं समझदे।

8 हम इब न्यू जानां सां के जै कोए व्यवस्था के विधान का ठीक ठीक ढाळ तै इस्तेमाल करै, तो व्यवस्था सारया तै बढ़िया सै। **9** अर्थात न्यू जाणदे होए के व्यवस्था का विधान धर्मीयां के खात्तर नीं बल्के उद्दण्डां, बिद्रोहियां, अश्रद्धालुआं, पापियां, अपवित्रां, अधार्मिकां, माता-पिता के मारण आळे हत्यारां, **10** जारां, समलिंग कामुको, शोषणकर्ताओं, झूठ बोल्लण आळयां, सूह तोड़ण आळयां या इसे ए अन्य काम्मां के खात्तर सैं, जो सारया तै बढ़िया शिक्षा के बिरोध म्ह सैं। **11** वा शिक्षा पणमेसर के महिमामय सुसमाचार के मुताबिक सै। ओ सुधन्य पणमेसर तै मिलै सै। अर उसे मैरे तारीं सौंघ्या गया सै।

पणमेसर के अनुग्रह का धन्यवाद

12 मैं म्हारे प्रभु यीशु का धन्यवाद करूँ सू। मैरे तारीं उससे नै शक्ति दी सै। उसने मैरे तारीं बिश्वास जोग्गा समझ के आपणी सेवा म्ह लाया सै। **13** हालाके पहल्या मैं उसका अपमान करण आळा, सताण आळा तथा एक अविनीत माणस था किन्तु मैरे पै दया करी गयी क्यूँके एक अबिश्वासी के रूप म्ह न्यू नीं जाणदे होए के मैं के कुछ करण लागरया सू, मन्ने सब कीमे करया **14** अर प्रभु का अनुग्रह मैरे तारीं भोत ए घणा मिल्या अर गेल्या ए ओ बिश्वास अर प्रेम भी जो मसीह यीशु म्ह सै।

15 यो कथन साच्चा सै अर हरेक किसे के मानण के जोग्गा सै के यीशु मसीह इस संसार म्ह पापियां का उद्धार करण के खात्तर आया सै। फेर मैं तो सारया तै बड्डा पापी सू। **16** अर इस करके तो मैरे पै दया करी गयी। के मसीह यीशु एक बड्डे पापी के रूप म्ह मेरा इस्तेमाल करदे होए आग्ये चाल के जो लोग उसम्ह बिश्वास ग्रहण करैंगे, उनके खात्तर अनन्तजीवन पाण के खात्तर एक उदाहरण के रूप म्ह मैरे तारीं स्थापित कर आपणी असीम सहनशीलता दिखा सके। **17** इब उस अनन्त सम्राट, अमर, बिन दिक्खण आळे, ऐकले पणमेसर का युग युगान्तर लग सम्मान अर महिमा होन्दी रहवै। आमीन!

18 मैरे बेट्टे तीमुथियुस, भविष्यवक्ताओं के बचनां के मुताबिक भोत पटल्ले तै ए तैरे बाबत म्ह जो भविष्यबाणीयां कर दी गयी थीं, मैं तैरे तै ये आदेश देण लागरया सू, ताके तू उनके मुताबिक **19** बिश्वास अर सारया तै बढ़िया चेतना तै भर के नेक्की की लड़ाई लड़ सके। कीमे इसे सैं जिनकी उत्तम चेतना अर बिश्वास नास हो गे सैं। **20** हुमिनयुस अर सिक्ंदर इसे ए सैं। मन्ने उन तारीं शैतान तारीं सौंप दिया सै ताके उन तारीं पणमेसर के बिरोध म्ह पणमेसर की निन्दा करण तै रोककण का पाठ पढ़ाया जा सके।

लुगाई-माणसां के खात्तर कीमे नियम

2 सारया तै पहल्या मेरा खास करके यो निवेदन सै के सारया के खात्तर आवेदन, प्रार्थनाएँ, अनुरोध अर सारे माणसां की ओड़ तै धन्यवाद दिए जावें। **2**शासकां अर सारे अधिकारियां ताहीं धन्यवाद दिए जावें। ताके हम चैन के गेल्या शान्ति तै सम्पूर्ण श्रद्धा अर पणमेसर के बाबत सम्मान तै भरया जीवन जी सकां। **3**यो म्हारे उद्धारकर्ता पणमेसर ताहीं राज्जी करण आळा सै। यो सारया तै बढ़िया सै।

4ओ सारे माणसां का उद्धार चाहवै सै अर चाहवै सै के वे सत्य नै पिछाणे **5**कर्युके पणमेसर एक ए सै अर माणस तथा पणमेसर के बिच्चाळे बिचोल्ला भी एक ए सै। ओ खुद एक माणस सै, मसीह यीशु। **6**उसनै सारे लोगां के खात्तर खुद ताहीं फिरौती के रूप म्ह दे दिया सै। इस ढाळ उसनै उचित बख्त पै इसकी गवाही दी। **7**तथा इसी गवाही का प्रचार करण के खात्तर मेरे ताहीं एक प्रचारक अर प्रेरित नियुक्त करया गया। (या मैं साच्ची कहण लागरया सूँ, झूठ नीं) मेरे ताहीं विधर्मियां के खात्तर बिश्वास तथा सत्य के उपदेशक के रूप म्ह भी ठहराया गया।

माणस एवं लुगाई के बारे म्ह खास निर्देश

8इस करके मेरी मर्जी सै के हरेक किते सारे माणस पवित्र हाथां नै ऊपर ठाके पणमेसर के बाबत समर्पित होके बिना किसे छोह अथवा मन-मुटाव के प्रार्थना करें।

9इस्से ढाळ लुगाईयां तै भी मैं न्यू चाहूँ सूँ के वे सीधे-साधे बाणे म्ह शालीनता अर अपणे पै काब्बू राखके रहवें। अपणे आप ताहीं सजाण संवारण के खात्तर वे केशों की वेणियाँ ना सजावें तथा सोने, मोतियों अर कीमती कपडयां तै श्रृंगार ना करें **10**बल्के इसी लुगाईयां नै जो अपणे आप नै पणमेसर की भगतणी मानै सै, उनके खात्तर उचित यो सै के वे खुद ताहीं उत्तम कामां तै सजावें।

11एक लुगाई नै चहिये के ओ शान्त भाव तै सारे ढाळ के समपर्ण के गेल्या शिक्षा नै अपणावै। **12**मैं यो नीं चाहन्दा के कोए लुगाई किसे माणस नै सिखावै पढ़ावै अथवा उस पै राज करै। बल्के उस ताहीं तो बोलबाल्ली ए रहणा चहिये।

13कर्युके आदम ताहीं पहल्या बणाया गया था अर फेर पाच्छै हव्वा ताहीं। **14**आदम ताहीं बहकाया नीं जा सकया था किन्तु लुगाई ताहीं बहका लिया गया अर ओ पाप म्ह पतित हो गी।

15किन्तु जै वे माता के फर्जा नै निभान्दे होए बिश्वास, प्रेम, पवित्रता अर पणमेसर के बाबत समर्पण म्ह बणी रहवें तो उद्धार नै जरूर पा लेवेंगी।

कलीसिया के देखरेख करणीये

3 **1**यो एक बिश्वास करण के जोगा कथन सै के जै कोए देखरेख करणीया बनणा चाहवै सै तो ओ एक आच्छे काम की मर्जी राखवै सै। **2**इब देखो उस ताहीं एक इसा जीवन जीणा चहिये जिसकी लोग न्यायसंगत बुराई नीं करण पावें। उसके एक ए बिरबान्नी होणी चहिये। उस ताहीं शालीन होणा चहिये, आत्मसंयमी, सुशील तथा मेहमान नवाजी करण आळा एवं शिक्षा देण म्ह निपुण होणा चहिये। **3**ओ दारुबाज नीं होणा चहिये, ना ए उस ताहीं रोळे करण आळा होणा चहिये। उस ताहीं तो सज्जन तथा शांतिप्रिय होणा चहिये। उस ताहीं पिस्याँ का प्रेम नीं होणा चहिये। **4**अपणे कुणबे का ओ आच्छा इंतजाम करणीया हो तथा उसके बाळक उसके काब्बू म्ह हो। उसका पूरा आदर करदे हो। **5**जै कोए अपणे कुणबे का ए इंतजाम करणा नीं जाणदा तो ओ पणमेसर की कलीसिया का इंतजाम किस ढाळ कर पावैगा?

6ओ एक नया चेला नीं होणा चहिये ताके ओ घमण्ड तै फुल नीं जावै। अर उस ताहीं शैतान जिसा ए दण्ड भोगणा पड़े। **7**इसके अलावा बाहरण के लोगां म्ह भी उसका आच्छा नाम हो ताके किसी बुराई म्ह फँस के शैतान के फंदे म्ह ना पड़ जावै।

कलीसिया के सेवक

8इस्से ढाळ कलीसिया के सेवकां ताहीं भी आदर आळे होणा चहिये जिसके शब्दां पै बिश्वास करया जावै। दारु पीण म्ह उसकी दिलचस्पी नीं होणी चहिये। भुन्डे रास्तयां तै उन ताहीं धन कमाण की इच्छुक नीं होणा चहिये। **9**उन ताहीं तो पवित्र मन तै म्हारे बिश्वास के गहरे सत्यां ताहीं थाम्बे राखणा चहिये। **10**इन ताहीं भी पहल्या निरीक्षकां के समान परखया जाणा चहिये। फेर जै उनके बिरोध म्ह कीमे ना हो जद्दे इन ताहीं कलीसिया के सेवक के रूप म्ह सेवा का काम करण देणा चहिये।

11इस्से ढाळ लुगाईयां नै भी आदर के जोगा होणा चहिये। वे बदनाम नीं होणी चहिये, बल्के शालीन अर हरेक बात म्ह बिश्वास जोगी होणी चहिये। **12**कलीसिया के सेवक ताहीं

सिर्फ एक ए बीरबानी होणी चाहिये तथा उस ताहीं अपणे बाळ- बच्चां तथा अपणे घरानां का आच्छा इंतजाम करणीया होणा चाहिये। **13**क्यूँके जै वे कलीसिया के इसे सेवक के रूप म्ह होंगे जो उत्तम सेवा प्रदान करै सैं, तो वे अपणे खात्तर आदर आळी जंगहा बणावैगे। यीशु मसीह के बाबत बिश्वास म्ह पक्का ए उनकी आस्था होगी।

म्हारे जीवन का रहस्य

14मैं इस आस के गेल्या थारै ताहीं ये बात लिक्खण लागरया सूँ के तावळा ए थारै धौरै आऊँगा। **15**जै मनै आण म्ह टेम लाग जावै तो थमनै बेरा रहवै के पणमेसर के कुणबे म्ह, जो जिन्दे पणमेसर की कलीसिया सै, किसे ताहीं आपणा बिवार किसा राखणा चाहिये। कलीसिया ए सत्य की नीम अर बुनियादी खम्बा सै। **16**म्हारे धर्म के सत्य का रहस्य बिना शक महान सै:

मसीह नर देही धरकै प्रगट होया, आत्मा नै उस ताहीं नेक साधा, सुर्गदुतां नै उस देख्या, ओ राष्ट्रां म्ह प्रचारित होया। जग नै उस पै बिश्वास करया, अर उस ताहीं महिमा म्ह ऊपर उठाया गया।

झूठे उपदेशकां तै चौकन्ने रहो

4 आत्मा नै साफ तरियां तै कह्या सै के आगै चाल के कुछ लोग भटकान आळे झूठे भविष्यवक्तायां के उपदेशां अर भुंडी औपरी आत्मायां की शिक्षा पै ध्यान देण लागैगे अर बिश्वास तै भटक जावैगे। **2**उन झूठे पाखण्डी लोगां के कारण इसा होगा जिनका मन मान्ने तपदे लोहे तै दाग दिया गया हो। **3**वे ब्याह बाबत नाँटेंगे। कुछ चीज खाण नै मना करैगे जिन ताहीं पणमेसर के बिश्वासियां तथा जो सत्य नै पिछाणै सैं, उनके खात्तर धन्यवाद दे के ग्रहण कर लेण नै बणाया गया सै। **4**क्यूँके पणमेसर की रची हरेक चीज सारया तै बढ़िया सै तथा कोए भी चीज त्यागण जोगी कोनी सै पर शर्त या सै उस ताहीं धन्यवाद के गेल्या अपणाओ। **5**क्यूँके ओ पणमेसर के बचन अर प्रार्थना तै पवित्र हो जावै सै।

मसीह के सारया तै बढ़िया सेवक बणो

6जै थम भाइयां नै इन बात्तां का ध्यान दुवान्दे रहोगे तो मसीह

यीशु के इसे उत्तम सेवक ठहरोगे जिसका पालन-पोषण, बिश्वास के जरिये अर उससे साच्ची शिक्षा के जरिये होवै सै जिस ताहीं तनै अपणाया सै। **7**बुद्धियाओं की पणमेसर विहीन मनगढ़ंत आळी कथाओं तै दूर रहो तथा पणमेसर की सेवा के खात्तर अपणे ताहीं साधण म्ह लागे रहो। **8**क्यूँके देही आळी साधना तै तो थोड़ा सा ए फैयदा होवै सै जब के पणमेसर की सेवा हरेक ढाळ तै कीमती सै क्यूँके इसम्ह आज के बख्त अर आण आळे जीवन के खात्तर दिया गया आशीर्वाद समाया होया सै। **9**इस बात पै पूरी तरियां अधीन रह्या जा सकै सै अर यो पूरी तरियां अपनाण जोगा सै। **10**अर हम लोग इस करके करड़ी मेहनत करदे होए जूझदे रह्यां सां। हमनै आपणी आस सारया के, खास करके बिश्वासियां के, उद्धारकर्ता जिन्दे पणमेसर पै टिका दी सैं।

11इन्ने बात्तां का आदेश अर उपदेश दो। **12**तू इब्बे गाबरू सै। इससे तै कोए थारै ताहीं तुच्छ ना समझै। बल्के तू आपणी बातचीत, चाल-चलन, प्रेम-प्रकाशन, अपणे बिश्वास अर पवित्र जीवन तै बिश्वासियां के खात्तर एक नमूना बण जा।

13जिब लग मैं आऊँ तू शास्त्रां के खुल्ली तरियां पाठ करण, उपदेश अर शिक्षा देण म्ह अपणे आप ताहीं लगाए राख। **14**तैरे ताहीं जो बरदान मिल्या सै, तू उसका इस्तेमाल कर यो तैरे ताहीं नबियां की भविष्यबाणी के नतीज्जे के रूप म्ह बुजुर्गा के जरिये तैरे पै हाथ धरके दिया गया सै। **15**इन बात्तां पै पूरा ध्यान लगाए राख। इन्ने म्ह स्थित रह ताके तेरी बढ़ोत्तरी सारे लोगां के श्यामी प्रगट हो। **16**अपणे जीवन अर उपदेशां का खास करके ध्यान राख। उन्ने पै टिकया रह क्यूँके इसा आचरण करदे रहण तै तू खुद अपणे आपका अर अपणे सुनण आळयां का उद्धार करैगा।

5 **1**किसी बड्डी उग्र के माणस के गेल्या करडेपण तै मतना बोल्लो, बल्के उन ताहीं पिता के रूप म्ह देख्दे होए उनके बाबत विनम्र रहो। अपणे तै छोट्यां के गेल्या भाइयां जिसा बिवार करो। **2**बड्डी लुगाइयां नै माँ समझो तथा जवान लुगाइयां ताहीं आपणी बहन समझ के पूरी पवित्रता के गेल्या बिवार करो।

बिधवायां की देखभाल करणा

3उन बिधवायां का खास करके ध्यान राखो जो असलियत म्ह बिधवा सैं। **4**किन्तु जै किसे बिधवा के बेट्टे-बेटी अथवा

नात्ति-पोते सैं तो उन ताहीं सारया तै पहल्या अपणे धर्म पै चाल्दे होए अपणे कुणबे की देखभाल करणा सिखणा चाहिये। उन ताहीं चाहिये के वे अपणे माता-पितायां के पालन-पोषण का बदला चुकायें क्यूँके इसतै पणमेसर खुश होवै सै। 5वा लुगाई जो असलियत म्ह बिधवा सै अर जिसका ध्यान राक्खण आळा कोए नीं सै, तथा पणमेसर ए जिसकी आसायां का सहारा सै ओ दिन-रात बिनती तथा प्रार्थना म्ह लाग्गी रहवै सै। 6किन्तु विषय भोग की दास बिधवा जिन्दे जी मरे हुए कै बरगी सै। 7इस करके बिश्वासी लोग्गां ताहीं इन बात्तां का(उनकी सहायता का) आदेश दो ताके कोए भी उनकी बुराई ना कर पावै। 8किन्तु जै कोए अपणे रिश्तेदारां, खास करके अपणे कुणबे के सदस्यां की सहायता नीं करदा, तो ओ बिश्वास तै फिर गया सै तथा किसे अबिश्वासी तै भी घणा भूँडा सै।

9उन बिधवायां की खास लिस्ट म्ह जो आर्थिक सहायता लेण लागरी सैं उस्से बिधवा का नाम लिख्या जावै जो घाट तै घाट साठ की हो ली हो तथा जो पतिव्रता रही हो 10तथा जो बाळ बच्चां ताहीं पाल्दे होए, मेहमान नवाज्जी करदे होए, पवित्र लोग्गां के पैर धोँदे होए, दुखियाँ की सहायता करदे होए, आच्छे काम्मां कै बाबत समर्पित होकै सारी तरियां के उत्तम काम्मां के खात्तर जानी-मानी जान्दी हो।

11किन्तु जवान-बिधवायां ताहीं इस लिस्ट म्ह सामल मतना करो क्यूँके मसीह कै बाबत उनके समर्पण पै जिब उनकी विषय वासना पूर्ण इच्छाएँ हावी होवै सैं तो वे फेर ब्याह करणा चाहवै सैं। 12वे अपराधिनी सैं क्यूँके उन्ने आपणी मूलभूत प्रतिज्ञा ताहीं तोड़या सै। 13इसकै अलावा उन ताहीं आलस की आदत पड़ जावै सै। वे एक घर तै दुसरे घर हांडै फिरै सैं तथा वे ना सिर्फ आलसी हो जावै सैं, बल्के वे बातूनी बण के लोग्गां के काम्मां म्ह टांग अड़ण लाग्गै सैं अर इसी बात बोल्लण लाग्गै सैं जो उन ताहीं नीं बोलणी चाहिए। 14इस करके मैं चाहूँ सूँ के जवान बिधवाएँ ब्याह कर लेवैं अर ऊलाद का पालनपोषण करदे होए अपणे घर बार की देखभाल करै ताके म्हारे दुश्मनां ताहीं म्हारै पै कटाक्ष करण का कोए मौक्का नीं मिल जावै। 15मैं न्यू इस करके बताण लागरया सूँ के कुछ बिधवाएँ भटक के शैतान कै पाच्छे चाल्लण लाग्गी सैं।

16जै किसे बिश्वासी लुगाई कै घर म्ह बिधवाएँ सैं तो उस

ताहीं उनकी सहायता खुद करणी चाहिये अर कलीसिया पै कोए भार नीं गेरणा चाहिये ताके कलीसिया साच्ची बिधवायां की सहायता कर सकै।

बुजुर्ग एवं अन्य बात्तां कै बारे म्ह

17जो बुजुर्ग कलीसिया की उत्तम अगुवाई करै सैं, वे दुगुने सम्मान के पात्र होणे चाहिये। खास करके वे जिनका काम उपदेश देणा अर पढ़ाणा सै। 18क्यूँके शास्त्र म्ह कह्या गया सै, “बैल जिब खलिहान म्ह हो तो उसका मुँह मतना जुड़ो।” तथा, “मजदूर ताहीं आपणी मजदूरी पाण का अधिकार सै।”

19किसे बुजुर्ग पै लगाए गये किसे तोहन्द ताहीं जद लग स्वीकार मतना करो जिब लग दो या तीन गवाहियाँ ना हों। 20जो सदा पाप म्ह लाग्गे रहवै सैं, उन ताहीं सारया के श्यामी डॉटो-फटकारो ताके बाकी के लोग भी डरैं।

21पणमेसर, यीशु मसीह अर छोट्टे होए सुर्गदुतां कै श्यामी मैं सच्चाई कै गेल्या आदेश देऊँ सूँ के तू बिना किसे पूर्वाग्रह के इन बात्तां का पालन कर। मेर-तेर कै गेल्या कोए काम मतना कर।

22बिना बिचारे किसे ताहीं कलीसिया का प्रधान बनाण कै खात्तर उस पै तगाज्जे म्ह हाथ मतना धर। किसे कै पापां म्ह हिस्सेदार मतना बण। अपणे ताहीं सदा पवित्र राख।

23सिर्फ पाणी ए मतना पिन्दा रह। बल्के अपणे हाजमें अर बार-बार बीमार पड़ण तै बचण कै खात्तर थोड़ा सा दाखरस भी ले लिया कर।

24कुछ लोग्गां के पाप साफ़ रूप तै प्रगट हो जावै सैं अर न्याय कै खात्तर पेश कर दिए जावै सैं किन्तु दुसरे लोग्गां के पाप बाद म्ह प्रगट होवै सैं। 25इस्से ढाळ भले काम भी साफ़ तरियां तै प्रगट हो जावै सैं जो प्रगट नीं होंदे वे भी लुहके नीं रह सकदे।

दासां कै बारे म्ह खास निर्देश

6 1लोग जो अंधबिश्वासियाँ कै जूए कै तळै दास बणे सैं, उन ताहीं अपणे मालिकां ताहीं सम्मान कै जोगे समझणा चाहिये ताके पणमेसर के नाम अर म्हारे उपदेशां की बुराई ना हो। 2अर दासां ताहीं भी जिनके मालिक बिश्वासी

सैं, बस इस करकै के वे उनके धर्म भाई सैं, उनके बाबत कम सम्मान नीं दिखाणा चाहिये, बल्के उन ताहीं तो अपणे मालिकां की और घणी सेवा करणी चाहिये क्यूँके जिनै इसका फैयदा मिलण लागरया सै, वे बिश्वासी सैं, जिनै वे प्रेम करै सैं।

इन बातां ताहीं सिखान्दे रहो तथा इनका प्रचार करदे रहो।

झूठे उपदेश अर साच्चा धन

3 जै कोए इनतै न्यारी बात सिखावै सै तथा म्हारे प्रभु यीशु मसीह के उन सद्वचनं ताहीं नीं मान्ने सै तथा भगति तै भरपूर शिक्षा तै सहमत नीं सै 4 तो ओ घमण्ड म्ह फूलरया सै तथा कीमे भी कोनी जाणै सै। ओ तो कुतर्क करण अर शब्दां नै लेकै झगड़ण की बिमारी तै धिररया सै। इन बातां तै तो ईर्ष्या, बैर, निन्दा-भाव तथा गाली-गलौज 5 एवं उन लोग्गां के बिच्चाळै जिनकी बुद्धि बिगड़ गी सै, लगातार बणे रहण आळे मतभेद पैदा होवै सैं, वे सत्य तै दूर सैं। इसे लोग्गां का बिचार सै के पणमेसर की सेवा धन कमाण का ए एक साधन सै।

6 पक्का ए पणमेसर की सेवा भगति तै ए माणस सम्पन्न बणै सै। इस्से तै संतोष मिलै सै। 7 क्यूँके हम संसार म्ह ना तो कीमे लेके आए थे अर ना ए उरै तै कीमे ले के जा पावांगे। 8 इस तरियां तै जै म्हारै धोरै रोट्टी अर कपड़ा सै तो हम उस्से म्ह संतुष्ट सां। 9 किन्तु वे जो अमीर बनणा चाहवै सैं, लालच म्ह पड़के जाळ म्ह फँस जावै सैं तथा उन ताहीं इसी घणखरी बेअक्ली तै भरी अर नास करण आळी इच्छाएँ गेर लेवै सैं जो लोग्गां नै पतन अर नास की खाई म्ह धका देवै सैं। 10 क्यूँके धन का प्रेम हरेक ढाळ की बुराई नै जन्म देवै सै। कुछ लोग आपणी इच्छायां के कारण ए बिश्वास तै भटक गे सैं अर उनै अपणे खात्तर महान दुःख की सृष्टि कर ली सै।

याद राक्खण आळी बात

11 किन्तु हे पणमेसर के जन, तू इन बातां तै दूर रह तथा

धार्मिकता, भगति तै भरी सेवा, बिश्वास, प्रेम, धीरज अर सज्जनता म्ह लाग्या रह। 12 म्हारा बिश्वास जिस उत्तम स्पर्धा की चाहन्ना करै सै, तू उस्से कै खात्तर संघर्ष करदा रह अर अपणे खात्तर अनन्त जीवन ताहीं अर्जित कर ले। तैरे ताहीं उस्से कै खात्तर बुलाया गया सै। तन्नै भोत से गवाहां कै श्यामी उस ताहीं भोत आच्छी तरियां स्वीकारा सै। 13 पणमेसर कै श्यामी, जो सारया ताहीं जीवन देवै सै तथा यीशु मसीह कै श्यामी जिसनै पुन्तियुस पिलातुस कै श्यामी भोत आच्छी गवाही दी थी, मैं तैरे ताहीं यो आदेश देऊँ सूँ के 14 जब लग म्हारा प्रभु यीशु मसीह प्रगत होवै सै, जद लग तैरे ताहीं जो आदेश दिया गया सै, तू उस्से पै बिना कोए कमी छोड्हे बेकसूर भाव तै चाल्दा रह। 15 ओ उस परम धन्य, एक छत्र, राजायां के राजा अर सम्राटां के प्रभु ताहीं उचित बख्त आण पै प्रगत कर देगा। 16 ओ अगम्य चाँदणै का बासिन्दा सै। उस ताहीं ना किसे नै देख्या सै, ना कोए देख सकै सै। उसका आदर अर उसकी अनन्त शक्ति का फैलाव होंदा रहवै। आमीन।

17 इब हाल के युग की चिज्जां कै कारण जो अमीर बणे होए सैं, उन ताहीं आज्ञा दे के वे घमण्ड ना करै। अथवा उस धन तै जो तावळा चल्या जावैगा कोए आस ना राक्खै। पणमेसर पै ए आपणी आस टिकावै, जो म्हारै ताहीं म्हारे आनन्द कै खात्तर सब कीमे भरपूर देवै सै। 18 उन ताहीं आज्ञा दे के वे आच्छे-आच्छे काम करै। उत्तम काम्मां तै ए धणी बणै। उदार रहवै अर दुसरयां कै गेल्या आपणी चीज बाँडै। 19 इसा करण तै ए वे एक सुर्गीय कोष नै कट्टा करैगे जो आण आळे बख्त कै खात्तर मजबूत नींम सिद्ध होगा। इस्से तै वे साच्चे जीवन नै थाम्बे रहवैगे।

20 तीमथियुस, तैरे ताहीं जो सौँप्या गया सै, तू उसकी रुखाळी कर। बेकार की सांसारिक बातां तै बच्या रह। तथा जो “झूठा ज्ञान” तै संबंघित बेकार के बिरोधी बिश्वास सैं, उनतै दूर रह क्यूँके 21 कुछ लोग उन ताहीं मांदे होए बिश्वास तै डिग गे सैं।

पणमेसर का अनुग्रह थारै गेल्या रहवै।

